

Curpa di Mitch Henriquez a yega Aruba



LesA A2

Curpa di Mitch Henriquez a yega Aruba



ORANJESTAD - Un grupo di hende a bin ricibi e famia di defunto Mitch Henriquez na aeropuerto diamars atardi.

E yegada di e famia y e curpa di e defunto a wordo anuncia adelanta. Atencion di prensa tambe tabata grandi, manera por a spera. Esunnan pre-

sente mesora a cuminsa cu e caminata silencioso, for di e tereno di Aerocargo na aeropuerto, te na e funerario Aurora Funeral Home na altura di Cumana. Escolta pa polis, e mama, kibra di tristesa y e ruman a guia e caminata, pero den un auto cora. Na yegada na e funeraria, e grupo a crece y a tabatin mas hende

wardando riba e grupo. Na yegada, e ruman muhe Lila a hiba palabra, gradiciendo tur esunnan presente pa e sosten na Hulanda y Aruba. "Pa nos aworaki, e prioridad aworaki ta dera mi ruman" Henriquez a bisa. "Despues nos lo cana pa busca husticia. Esey ta bira e proximo paso. Pero e prome paso ta pa nos dera mi ruman" Henriquez a sigui bisa. A pidi sosten pa duna famia respet pa por surpasa e perdida grandi aki, den tur privacidad. Notabel tabata e presencia di e representacion di Hulanda na Aruba, den persona di Sra.

Tanja Timmermans y e vocero, y tambe parti di fraccion di partido MEP, lidera pa e lider Evelyn Wever Croes. "Nos a bin demostra na e famia cu esaki realmente ta un suceso hopi tristo. Nos ta biba e momentonan aki cu e famia", Timmermans a bisa. Lider di MEP, tabata satisfecho cu e grupo cu a bin. "Chikito pero importante. E tabata bon representa" Wever a bisa di esunnan cu a participa na e caminata. Diaranson anochi tin chens pa condoleer, sigui pa e entiero mes cu ta diahuebs atardi. □